

百
柱
堂
全
集

百柱堂全集卷七

庚子辛丑

監利王柏心子壽著

郡城春望同春木翁

裊裊春雲覆女牆青皋二月足年芳
林風散入千村暖花氣晴浮萬堞香
鎖鑰尙傳雄鎮重關河唯覺客心長
韶華不醉今何待號鳥聲聲報夕陽

寄郭南村

五音競繁會雜綵紛陸離雅道日淪替
元黃悲素絲慨焉慕六義正始安可追
之子抗貞則高步遊莊遙落落造澹泊
往往參希夷風泉渙清聽秋馥揚英蕤
想見煙蘿人仗策忘歸

遲淵尙我獨愜遐心人豈知自非柴桑叟難可與等期

往與二三子矯志希昔賢飛伏一以判邈若雲與淵豈唯判

飛伏逝者歸黃泉

謂衡香
季舉

惟子謝塵鞅高蹈栖幽元夕延緣

蘿月朝羃青桂煙愉色奉潔養妻子皆陶然俛仰一庭內自
有羲皇年嗟予困長坂鹽車難自前逝將耦沮溺往耕南郭
田

送陶苦卿之衡陽謁其季父

壯矣圖南翼曾無芥蒂胸行經洞庭渚望見祝融峰日月多
奇采雲霞少定容禹碑猶可辨爲訪碧苔封

離筵歌楚調行子去章臺水大愁魚上峰高少雁來言諄蘭

芷路更會竹林杯努力騏驎步金門仁俊才

寄輓李海帆方伯

豈弟流邊徼旬宣擁大藩出持羊傳節歸臥謝公墩飢溺
民命江湖戀主恩猶聞誰嗣誦遺愛至今存

綜貫兼文武冲和表性情檐帷原岳牧鈴閣儼儒生北海風
流接南樓月色清遠慙徐孺子絮酒幾時傾

寄懷春木丈

元亭問字清樽滿南郡談經白髮多萬里兵戈懸海國百年
心事老關河流亡井邑愁經眼悵望賓朋起放歌誰念清秋
杜陵客宵來伏枕傍鼃鼃

病起遣懷

柴門遙倚荻花開
病起臨江日幾回
秋老龍蚪寒自蟄
天高鴻雁響逾哀
難招徑外羊求侶
誰問山中管葛才
但使九州歌擊壤
腐儒焉敢薄蒿萊

寄李大心海

所思陸城下
不見八載餘
以我客遊久
非君音信疏
無才甘藪澤
將隱狎樵漁
獨憶平生友
寥寥悵索居

城南卜居好
閉戶獨憐君
徑僻多黃葉
山深長白雲
有懷舒阮嘯
何客薦雄文
爲報同心侶
行從鷗鷺羣

遙送息鄰觀察入都

三年南國使君旗得失尊前一笑餘謫宦幾人猶憶閑浮家
何地可懸車名高耆宿今詞伯夢繞承明舊直廬鷹隼得時
方搏擊避風且作魯鷓鴣

壽泉參軍招同張韻仙飲黃鶴樓

長颯颯然至吹我上高樓白日千齡速滄江萬里流飛鳴慚
大鳥伏處媿潛蚪寄語羨門輩吾將凌十洲

清流兼永夕散吏有仙才此會信難得如何不舉杯疏星明
浦淑遠火雜樓臺俯仰已天際塵勞安在哉

南郡三日簡樸翁

葭灰緹室陽初轉蓬鬢滄江感不禁天上六龍方駐景雲間

二鳥合悲吟盈盈竹葉光浮醖
嫋嫋梅花香滿林
逆旅三逢
長至節登樓同起望鄉心

南郡逢張子
蕉泉歌以贈之

荊州城邊江捲沙
二月欲盡無鶯花
客從湘南訪江北
望古屈宋生咨嗟
生平南北半羈旅
落落逢人輒無語
少年不入金馬門
高志翻爲黃鵠舉
懷中著書今無倫
懸之足敵璠璣珍
貧來乍可儕原憲
世上誰能重子雲
江東姚叟老愛士
眼中之人屬吾子
王生亦客章臺旁
意氣憐君在泥滓
朔風撼空角聲急
雪花宵來照天白
蛟龍凍骨愁欲僵
飄飄朱鳳號南極
又聞有詔誅鯨鯢
虎符徵兵下郡國
戈船盪寇須此曹

我輩齷齪食匣中雄劍生埃塵嗚呼壯士無顏色

海上

青龍戰艦壓雲低海上春風入鼓鼙
跋浪頗聞翻鳳翼飛章頻請貸鯨鯢
行營壯士間投石上宰崇班人執珪
表餌奇謀仍未效空勞列陣似連雞

銅符日夜出神京萬里重溟總震驚
羽檄亟催橫海將矇矓大發習流兵
鸞帆晨擁風雲陣鯢壑宵飛霹靂聲
爲語舳艫諸戰士急將忠力答昇平

樓船千里下江陵擊楫中流士氣騰
盡道雷霆仲廟略猶虞水潦乏軍興
龍驤破浪真無敵雁戶扶犁或未勝
一戰自

茲銷劒戟更看秔稻滿郊塍

飲酒詩和楞翁

元亮慕魯叟功在禮樂新彌縫念六籍彼豈沈湎人我志亦有慕與世歸其真陶陶順帝則民氣樂且淳元酒有遺味往遊三皇春

高鳥遊層雲潛魚泳淥水雲水俱相忘機動任天使昔賢寓杯勺適性亦如此譬彼昭文琴妙豈寄絃指規規屈左徒獨醒懼其浼淵乎萬物宗吾將師奏始

今日雨初霽原野含餘滋出門見綠草始覺春已歸稀柳弄柔影當風何依依遇物盡生意此力誰所施陽和不言德草

水安能私歡然會我友玉壺繫青絲舉觴答造物登臺同熙
熙醉醒且不辨豈問醅與醪

昔者酈食其長揖隆準公憑軾下齊城掉舌何其雄據鼎遂
不免貪此尺寸功何如稱酒徒日醉高陽中嗟嗟馳騁士奔
車安所終

孟公如鴟夷滑稽日盛酒柏松危如瓶勺醪不入口酒客難
法度彼此互相糾吾欲論齊物證之漆園叟大笑視二豪螺
贏亦何有

昔在里居日往來東皋田南風吹桑麻秀色浮長天租稅吏
不擾簞車村相連田家釀初熟置酒爭招延勤苦各相勉對

之機智捐自從江漢湓不得耕故廬何時與農叟縱飲柴門邊

婁東姚夫子雅性嗜尊罍意得卽命酌興往罷舉杯譬若百花氣香逐東風來風定香亦止攬之安在哉達人罕凝滯玉山何必殯始知性真內自有糟邱臺

聞蔗泉移寓講院并簡榜翁

賓榻塵先埽朋簪氣益華楚筵分醴酒仙客繫浮楂感寄樓中賦心驚海上笳相看春又半雨雪滯鶯花

感春

淑景過春仲陰風日怒號愁霖迷井邑飛雹偏弓刀農器滿

將盡軍儲徵更勞幾時回霽色秀麥映東臯

杏花絕句和樗翁

西憐春色映簾櫳日日休教酒盞空莫待長條香雪盡簫聲
惆悵月明中

花前風雨怯春寒盼得花時春欲闌直到花開風又雨看花
仍未得花看

隴表春風別六年澹紅香白夢依然如今萬里無消息付與
何人載酒憐鞏昌郡齋東偏有杏數十株花時曾偕梅州廖
子器中唐生襄武樊生布席會飲今別來六載
矣

上巳雨不果遊簡樗翁蔗泉

寂寂春將晚瀟瀟雨未闌
楚天雲總濕澤氣晝多寒
消息遲挑菜風光罷采蘭
出門愁屐滑況復少花看

南郡春興同蔗泉作

一春已過六十日雨腳不斷多
于麻城上草根且未活君今
莫問章臺花

城外水深愁沒踝城中滑滑三尺泥
垂鞭來往少年子玉腕
驕驕不嘶

二麥田中凍欲死村村米貴無春糧
老農偷泣眼流血轉徙
未知依何鄉

長隄鼙鼓徵役夫身上雨雪兼泥塗
日暮飢腸得甃飽願從

官假完衣襦

四千健兒來益州誓埽長鯨南海頭聞道捉船斷行旅得錢
卽醉妖姬樓

朝來喜見晴光新况有紅英枝上春詩老披衣走邀客濁醪
同過西家隣

江水春連湘水深傷春詞客多沾襟庾園宋宅在何處不見
蘅蘭愁我心

南望重溟洗甲兵東郊臺笠聚春耕腐儒痛飲無一事日日
花間歌太平

三春

七澤眞寒谷三春有漏天流亡仍未復災沴一何偏風雪軍
中檄旌旗海上船因思賈大傅流涕太平年

江陵柳

依依柳色渡江來萬縷千絲結不開閨夢願爲天外絮隨風
直過粵王臺

攀條萬里送長征目斷戈船海上行從此妝樓春色少風光
偏屬亞夫營

雨竹

今年二月至三月雨雹日夜交縱橫當春肅殺氣更厲草木
不得舒勾萌路旁時有凍死骨牛種賣盡無人耕三農性命

迫溝壑調發更給樓船兵皇天卽時放晴旭忍死猶能待麥熟

春興六首和蔗泉

郢門芳序大蹉跎不見鈿車陌上過風雪三春花事少海天
萬里戰雲多經生推驗明災異詞客憂時罷嘯歌南望越臺
兵未解誰持一劍靖鯨波

重鎮徒聞節鉞懸如何鞞鼓動經年窮溟亦是天王地橫海
非無漢將船遂使蜮沙驕小醜可能犀炬徹重淵島夷來往
仍鳴鏑猶道飛書用魯連

潮頭翻動戴山鼇倏見天吳跋浪豪露布何曾三捷至宵衣

無乃九重勞樓臺，蜃氣當春暗燄火。
羊城入夜高太息，國殤終不返鬼雄。
魂魄葬波濤。

文昌上將出天關，銅虎新從殿上頒。
盡發千帆浮鶴首，先憑一戰慰龍顏。
藁街應戮蠻夷邸，京觀高封島嶼間。
南國轉輸連歲月，滄江日望凱歌還。

番禺城上有鳴笳，壯士從征不憶家。
旗幟青搖營外柳，烽煙紅入海邊花。
餘艘鬪關舸連雲，盛組練軍容照水華。
赤子瘡痍今不少，早銷金甲事桑麻。

颯颯寒風動地來，楚天雲氣壓章臺。
非時雨雹何爲至，積潦田園更可哀。
殄寇自宜方召略，貴農深望管簫才。
妖氛卽睹

機槍埽黃道晴光六合開

對月

薄霧雲猶濕中霄月漸明庭深遲照地天遠故依城不寢聞
鴛被誰家暖鳳笙春潮珠有淚其照海邊營

南郡參軍歌贈俞參軍鴻甫

南郡參軍走告我趙佗臺南盛烽火投袂欲往吞鯨鯢抽箭
仰射貪狼墮百餘年來狙互市奸民闌出不畏死廣州郭外
有夷舶嗚呼何人職禍始去秋已覆舟山城公然振柁趨南
溟粵師挫衄又相繼坐使蜃氣連天腥此輩畏威不懷德狡
焉貪慄豈有極議款者誰甘誤國參軍言之淚交臆誓爲國

家誠此賊懷策未得陳軍門位卑無人知參軍參軍位卑何
足傷男兒要自多慨慷去年江漲鳴奔湍萬人號哭聲向天
長隄岌岌勢將圯參軍障之堅且完生平膽決類如此惜哉
不得乘戈船九重新煩銅虎符天兵南指雷霆驅島夷不足
膏斧礮翦此羣醜如摧枯參軍不用更拊髀且爲南國順南
紀流庸歸來復田里桑麻滿地秀色起坐看東流大江水
寒食雨中簡樓翁蔗泉

江陵寒食節高館客愁新天外雲垂地人間雨斷春鶯花殊
未見裙屐轉難親二客風流士空然憶墊巾

詩聞粵東大捷奉寄前制府竹公三首同樓翁作

風埽敵人泣靈驅蜃母奔始聞警破膽誰議縱遊魂戈甲南
天礮梯航北戶尊連朝傳露布喜氣遍江村

漢家楊僕將橫海立功名一戰潮迎艦三春雨洗兵刑徒趨
購賞義士激忠貞亟修中行說恬波此自清

智略裴中立清名宋廣州騏驎仍在馭蛟鱷不須憂坐策無
遺算登壇已伐謀貂蟬原異數況乃出兜鍪

讀道家言

青牛去不返道喪五千言豈有長生術安知眾妙門陰陽何
可盜精氣亦虛存太息元珠渺終淪濁水源

聞侯官林公謫伊犁

萬里伊吾北孤臣鬢已霜奏書無耿育持節少馮唐曲突謀
猶在高墉射易傷鼓鼙思將帥終望埽欃槍

咏白菊和樗翁

秋卉有奇性由來昭質殊懷清非自異在濁不能汙東海魯
連子南邦屈左徒高風如未遠千載可同符

又作此示劉生

素心原自澹晚節不知寒履潔吾猶澹同塵汝亦難好脩恒
緝佩新沐必彈冠奇服誰能改聊從性所安

寄五弟子章

歸舟何日達未遣尺書聞秋老多風雨天長但水雲愁看楓

葉下惜與綠華分日暮煙汀立驚寒起雁羣

牛畝鷗波宅雙親鶴髮年繫予猶久滯念汝實能賢心力詠
茅瘁妻孥拾橡憐苗畬無斃輟晚獲有良田

秋來

栖栖江上客抱郭獨高歌潦後田園廢秋來鼓角多粵山猶
列戍閩海更橫戈頗牧今方出無爲歎薜蘿

蔡箋椽大令出舊遊詩見示

看春七上鳳城樓意氣飄然萬里遊京國川原雄陸海太行
風雨下并州蕭蕭湖柳雙隄路冉冉宮花六代秋知有租船
能咏史與君銷盡古今愁

仲閔至郢偕樗翁龍山秋望

客從江上來古懷積浩蕩出郭躋茲邱盍簪得吾黨緬昔軍
府遊風流閒英賞野潦依城隅瑟瑟映菰蔣古原多悲風秋
氣會林莽蒼煙倏然生微雨滌塵埃萬象同沈寥千齡速俯
仰遇物常寡歡厥抱何不廣好爵猶未羈槃阿縱所往且與
畱斯須矯首挹朝爽

並海

並海瞻妖孛當秋落將星頻干天震怒不念國威靈秦望烽
煙斷句章戰血腥投醪多壯士慷慨靖鯢鯢

簡仲閔

波深香草怨秋盡故人來寂寞三休路蕭條九辨才古原蒼
鼠竄暮堞皂鵬回君問渚宮事風流安在哉

道遠飛書疾天寒擊楫過角聲江上急戰骨海邊多赤羽連
甌越青山罷嘯歌貪狼芒未斂搔首奈愁何

元冥行

九月二十七日作

元冥噓氣何凜冽北風怒蹴海門裂四明之山撼欲折山下
鬪骸吹作雪烽煙已斷明州城越中日望西來兵西來舳艫
幾千里避風不得張帆行傳聞逆夷擅飛礮機發百里勢可
到高城雄堞如壞雲往往赤地若原燎蚩尤造兵實禍始矧

爾酷烈古無比天生五行民用之爾獨倒行逆其理元冥元
冥何不疾鼓寒門風滅此毒紹永衰止凍涸大海直見底狂
鯨怒蛟抱冰死

寄懷鳧香觀察都中

聞公解組帝城還日日開尊未許閒垂老丹心依魏闕中宵
清漏憶朝班三秋風雨黃流岸百戰旌旗滄海間 聖主宵
衣求國士肯令安石久東山

寄東漁津門

萬里潮寒碣石風戈船鼓角傍天東愁聞滄海秋多警卽恐
音書阻未通雲護九關闔闔近地連三輔甲兵雄屯軍細柳

深相倚百島長消燧火紅

憶唐生汝立

曾聞匹馬出幽燕度隴遊吳總渺然關塞蕭條秦樹外干戈
阻絕海雲邊鯨鯢浪激蓬萊島鴻雁音遲雨雪天吹角連江
驚未已深愁難達五湖船

重譯

百蠻重譯盡梯航封獸來從古越裳頗慮芻禾供不易猶煩
冠蓋道相望微垣日月蒼龍駕天策風雲赤驥驤禁衛鈞陳
原不乏旅獒誰爲進君王

海警同樗翁作

八月風高鼓怒鯨乘潮蹀血海邊城九天頻遣河魁將萬里
方徵蜀郡兵敢惜轉輸連道路獨煩宵旰念滄瀛孫盧出沒
仍難料三輔能無細柳營

登壇

傳聞衛霍已登壇日日旄頭海上看敵愾莫憂兵力寡折衝
誰信將才難鯨鯢經歲遊魂在猿鶴三秋戰骨寒此日深宮
勞拊髀捷書須報五雲端

耶溪

耶溪雄劒動星文竹箭稽山望若雲但倚江東多子弟無勞
天上下將軍投醪盡壯驍騰氣衣錦仍高戰伐勦回首禹陵

烽燧近亟乘兵力埽妖氛

北風行

荆南十日天早寒長風北來冰塞川
鵝鶻素鵬凍欲死虎豹縮瑟高空
山海邊鑿齒吮人血頗怪天公貸
汝活飛廉揚旗下帝關么麼窟穴
可盡刮眞宰豈得無肅殺健兒疾
赴東南征不見雪夜縛賊懸瓠城

寄九香大梁

聞道洪河決大梁吹臺千尺浸蒼茫
飛沙捲地三秋白濁浪浮天九曲
黃雨續盡憂淪息壤漢廷重議築
宣房一官眞類尋源使可許乘楂問
七襄

答孝長

奇氣劉郎漸欲平蕭然野服久逃名臨流自愛滄浪水感事
猶談澤潞兵治世未能無盜賊安邊終在用豪英東南亟望
銷金甲與子優遊託耦耕

寄木民興化

秋來甌越盛烽煙日望東南殺氣纏海路行營方轉戍淮壩
茂宰自鳴絃焚薪無力輸河伯將帥何人制水仙安得更如
龔渤海盡銷刀劒事耕田

探丸

姦猾生閭里爭探赤黑丸政平除莠易事急束薪難桴鼓聲

相繼流庸業未安自非徵卓魯何以撫凋殘

賣劍

昔聞廣陵守造壘泣張嬰盜賊能歸死閭閻正苦兵不須求
武猛止在用廉平賣劍從今始春深叱犢耕

答蕉泉

平子歸南國經年悵索居春來湘浦夢兵後故人書膏血悲
塗野瘡痍起荷鋤仍聞父老歎流涕補軍儲

得夏伯威書卻寄

曾窺日觀小齊州解紱歸來感百憂七澤疲農傷瓊尾三年
滄海望旄頭城隅春老蓬蒿宅江上舊傳杜若洲久客仲宣

君莫問情懷今已罷登樓

寄子重

滅盡元龍氣悲來孰可娛
干戈猶格鬪老大益艱虞
守節終成拙逢時轉覺迂
君今甘石隱吾亦慕潛夫

巨海

漢遣樓船日殷歌擗伐辰
旌旗連巨海斧鉞授宗臣
多壘猶相望奇兵自若神
豈無謝安石談笑靖煙塵

喜聞唐生汝立自吳還京

島嶼烽相照吳門客乍還
三年留海上一舸出兵間
消息猶疑夢傳聞爲解顏
圖南今已就鵬翼定難攀

寄立夫觀察津門

萬里滄溟靖連營壁壘堅功高籌筆後威在折衝先并鉞嚴
三輔參旗壯九天長城付儒者武庫獨森然

寄東漁

鯉庭趨海畔豹略讀燈前地重當三輔謀深出萬全軍威銳
虎肅陣勢鳥蛇連不見淮淝捷奇功屬少年

題東漁春感詩後

將相皆憂國滄溟未罷師時艱懷俊傑計大任安危欲獻金
門議空深深室悲高歌還自遣感慨少陵詩

遙送子方觀察入覲

春風謁帝向神京
詔獎河西治有聲
萬里星占聽馬使
九霄雲擁鳳凰城
海濱猶急飛芻役
關內方屯細柳營
聖主憂邊勞拊髀
固應前席待論兵

重過藻園簡鄧性田星門竹林

來往沙鷗熟相從
步履過橋連煙樹
合亭聚水雲多遠
道方兵甲吾儕自嘯歌
芟裳曾製否此地足槃阿

勝地半郊郭清遊任去來
經傳韋氏業野集謝家才
座客時看滿鄰花
日報開好間多樂事
況此好池臺春翁避水至
沙市館鄧星門學博養眞精舍

東
萬歌避世南郡罷傳經
江上呼窮士人間駐客星
勞生同

聞金陵戒嚴

潤州無一戰建業有長圍寇敢輕深入謀宜擊情歸金陵龍
虎氣玉帳烏蛇威急起江淮卒憑城早決機

敗竄千軍紀芻糧梗賊衝議輕中執法計細大司農打網多
狂兇探丸若聚蠹徐邳聞更決何策撫流庸

日徒蔽市賈同惡起相求飛炬燔京口揚帆指石頭山川非
不壯將帥太無謀卽墨區區地猶能縱火牛

乍報逃單騎旋聞餽百牢虛聲甘恫喝重賂罄脂膏候火鍾
山斷華筵幕府高倉皇惟餌敵無乃媿戎韜

得宗滌樓舍人書寄答

聖皇御紫極日月輝太清辰居拱列宿巖廊羅恩英夫子起
東越珥筆影長纓儼直鳳凰池禁地嚴且閔中天爛雲漢萬
象生光明綸言籍藻纘厥職良匪輕丈夫感意氣肝胆猶相
傾何況遇聖主顧盼非常榮庶幾竭翼翼夙夜據忠誠陋
彼漢枚馬詞賦安足名

涼飈起中夕撼我金井桐天高厲清響仰聽雲間鴻侵晨尺
書至遠自京華中君爲百尺幹余若九秋蓬殷勤枉牋翰秉
意一何冲蔓草未得賦伐木聲則同人生重許與片言凌華
嵩矧伊樂推獎愛勗心無窮媿非他山石助子以磨礪

雲鵬軼霄漢澤雉栖林邱飛伏志有在出處從所求念昔二

三子芳華凋素秋走也困短翮落落耽滄洲惟子揚令問
轡驅華駟側聞廟堂上猶煩君相憂子其展智略獻納陳嘉
謀折衝在尊俎廊清滄海流依然陶唐世唯見康衢遊吾儕
在藪澤沒齒蒙其休不辭南山下短布長飲牛

石柏歌

神農屈仲世不識化爲蠅螟亶盈尺君看石腹三寸莖乃有
新甫萬年柏憐女流轉滄江干攜向高齋盟歲寒巖山絳雪
足媚悅玦池淺水羅琅玕君不見漢家初構柏梁臺將作被
詔求良材萬牛輦致罄山谷連雲偃蓋何有哉明時梁棟自
不少斤斧紛紛委中道柏兮柏兮勿闕礪柯千丈姿與汝相

隨澗中老

寄鳧香觀察

清樽曾接鄂城遊人去京華兩度秋又見使星來北關依然
明月滿南樓漕通巴漢于艘下江入河淮萬里流雪夜儻思
梁苑賦賓筵猶有舊枚鄒

贈劉乙閣

海嶠五千里廬敖儻可逢去經大庾嶺歸壑祝融峰閉戶生
秋草高吟激古松夢中舊雲海猶覺盪心胸

百柱堂全集卷七終

百柱堂全集卷八

壬寅癸卯

監利王柏心子壽著

贈周筱樓

江漢風流渺沅湘
春色深時清身未遇客
久意難任欲學雲
中舉空懷澤畔吟
昔賢猶坎壈將子莫霑襟

未奏終軍對驅車
出帝京獨遊仍汗漫
百感益崢嶸古調人
誰賞高言眾易驚
君看鴻與鵠寥廓任長征

停雲四章和春木翁

涓涓者澮未若川
流如涇而止塊
彼崇邱農不務殖
歲則何尤
莊廩裹足時予之羞

我有良朋先民是勗矯枉以鬱耀黯以燭道隱小成士賤術
驚敬聞茲言矢之邁軸

我友云逖孰是弦章俛焉內省日與道違負瑕匿類不知其
非迷陽傷足吾安適歸

我友贈言遠自江濱申章用答視彼松筠風雨如晦我思古
人獨立不懼豈其緇磷

贈杜生若薰

嶧陽采脩幹製爲綠綺琴希聲感至德安能諧眾心伶倫一
以遇重此疏越音持汝歡清廟大雅何惜惜俗耳忽相重謂
是鸞鳳吟物論固如此悠悠匪自今

昨歲朔風中與子共尊酒別來貽我書感歎三春柳白日西
南馳俯仰孰不朽唯有奇傑人磊落千年後文藝徒虛車榮
華亦芻狗願子崇令名窮達視所守行矣各自愛離別復何
有

憶藻園遙寄性田詹事

尙憶名園路封詩訊主人池臺知轉勝花月若爲春洛水清
言日山陰襖飲辰自憐良會隔獨客向江濱

寄春木翁南郡

中宵思命駕亟起欲披衣乍覺川途渺方知夢寐非羈遊同
索寞物色換芳菲莫向高樓望天涯春又歸

題周荇農詩後

三載旄頭海上懸
頻聞赤子困戈鋌
當關大帥無高壘
憂國蒼生有少年
欽起馮唐重論將
方思侯應與籌邊
東南未是藥弓日
莫使犀軍罷控弦

題王牧莊公子詩卷

才高時駭俗氣盛恥爲儒
烽火連江表悲歌望海隅
登壇皆衛霍制勝孰孫吳
亦有橫腰劍羞言敵一夫

公子趨庭日曾攀七澤芳
塵中能結客戰後始還鄉
楚塞連山暗吳天入海長
何由作鴻鵠萬里共翱翔

龔季貞返自金陵出示近詩卽題其後

軍無勇與怯用之在一將將不得其人百萬未可仗龍韃天
上來養威處帷帳羣策非無才白徒豈難抗兩山當海門天
險古來壯狂寇敢長驅棄甲道相望哀哉東南民露背不得
葬謀國彼何人念之有餘愴

羣兇悉市賈安知兵家謀深入乃送死固壘吾何憂散金募
鬪士涕泣皆同仇歸氣彼已情一戰當虞劉奈何委縮幣墮
軍長寇讎子從兵閒來轉徙避戈矛親見文武吏惛息無一
籌崎嶇幸不死憤激爲悲謳此曹何足詆所嗟家國羞

青塘山居圖爲淩荻舟水部題

君愛青塘山復結青塘居春風吹向長安去白雲望望山中

廬思歸只憶青塘好年少臺郎拂衣早山中吹遍青松花飛
到白雲長不埽君不見躬耕草廬留隆中南陽不復歸卧龍
贊皇亦是英豪者平泉草木悲秋風將相勛名等閒盡何況
浮榮但朝菌以茲長揖歸青塘甃逐南山從豹隱送君去湘
水濱波渺渺石磷磷青塘山接衡山麓去訪山中衣白人

焦山望海圖爲龔季貞題

龔生好奇窮兩戒放眼欲凌六合外望海直上焦山巔未覺
胸中有芥蒂是時滄海如鏡清重溟斥候常不驚蛟龍萬怪
盡帖伏中天照耀羲輪明萬里島嶼浮空青此地由來壯天
險海門扼塞誰能犯時平軍鎮無遠謀連檣遂縱廬循艦君

不見自從駭鯨觸網裂曲阿城下日流血北府勁兵安在哉
沿江邀遮無一卒石頭列戍亦盡撤龔生避地走蹶躡我聞
焦山橫截江海流翼蔽東南數十州百夫守險豈得過誰啟
鏃鏑遺國憂生乎莫上焦山望潮頭正接黃天蕩斬鼉無劍
但惆悵安得頗牧起乘障

晚坐雪堂

沙際楓初脫蒼茫浦溆環寒風傳朔氣暝色下西山物役誰
能遣江流故自閒坐忘惟隱几不覺暮禽還

晤季雅

戎馬君方竄黿鼉我作隣何圖重見日猶作再生人閭閻懸

丹極星雲翊紫宸匡時須稷契延首望良臣

與季雅夜話

身世奈愁何酌君金巨羅文章耆舊少

年來李申嘗毛生甫龔定庵朱西生均先

後下

世患難友朋多邱隴寒松柏巖廊眷薜蘿

滌樓書來有曼倩避世之語

儒冠安用此空唱扈屯歌

題吳雲門孝廉雪舫讀書圖

我識吳君歲丙子意氣直上青雲裏今來相見齊安城二十
八年一彈指酒酣示我雪舫圖此中曾讀瑯環書當時主人
盛文雅賓從落筆皆瓊琚計車屢作長安遊策上金門未見
收蕭然騎馬到階下先生學舍如宛邱君既負卻屠龍手余

亦飄零作蒲柳盛年豪氣不可畱日輪西墮江東走讀書何
用窮萬卷看人盡入金華殿太乙不照名山中笑汝日光空
似電君不見南來逐客峨眉仙文章流落滄江邊又不見紅
顏朱紱周使君謂芸臯觀察一旦薤露傷精魂世間金紫是何物
牖下抱卷非豪傑不如相從秉燭遊夜夜飛觴醉明月莫遣
蹉跎鬢成雪

遊武昌西山得詩六首

今晨美風日遂果西山遊招攜二三子出郭呼扁舟揚帆泝
輕浪浩蕩凌滄洲青天盡開豁倒影澄江流匹練忽點破片
片飛白鷗願見武昌山參差如雲浮歷歷吳王峴隱隱庾公

樓大笑竟飛渡往踐山之幽

入山不見山稍見寒溪寺闌無樵者踪朝露尙在地橋下幽
泉鳴因風戛瓊佩松根蟠螭龍突兀骨初蛻根畔絡危石行
者代揭厲詣寺生清涼了了發智慧寺後松連山入天有餘
翠昔聞長沙公舍佛表靈異偉哉英雄人大願實宏濟高臺
何巍然仰止未能至陶士行鎮武昌得文殊金像置諸西山
後遂于此建寺相傳陶公讀書臺猶在
寺後

出寺度澗壑西山始列屏緣磴百千轉始上九曲亭境高地
稍曠雲出不可扇林端俯眾岫迤邐環郊垌大江西南來勢
捲天空青遙帆隱可數出沒煙中汀髯仙舊遊處草木餘精

靈颯然山風至萬谷生雷霆浩歌望入荒俯仰還我形

有亭復相倚擁翠當其旁脩蘿翳喬木萬古惟青蒼
竚如坐綠海四顧何茫茫羲輪有不至六月無驕陽
幽禽與異蝶巖際時飛揚靈草匪一種惟覺芝華香
散髮坐磐石絺衣生微涼
返照射松頂參差流金光恍若躡黿背可以凌風翔

招提在山際昔是吳王宮當年此觴宴凭視何其雄
豈知霸王業滅沒如秋蓬遺構化梵宇浩劫嗟無窮
高閣又已燬虛

谷畱松風

松風閣已燬于火

言尋菩薩泉太息靈源封復悵劒池涵

無由窺奔猱僧言昨大雨瀑勢飛白龍一氣注萬壑上與銀河通
何當坐看此倒挂晴天虹

百集 卷之六
攝衣陟崇椒一覽小眾阜怪石裂穹窿猶識劒鋒剖談笑眇
杯湖隱約露樊口北望滄江流齊安僅崕巘飛步凌霞梯眞
仙可招手仰視閭闔門塵壒復何有日旰遂下山榜人待已
久巘影漾中流臨發屢回首松色猶送人翠壓衣袂厚歸來
任醉眠清夢寄林藪

題吳王試劒石

老瞞會獵誇百萬勃然拔劒怒斫案天遣一炬成三分炎鼎
不亡恃此戰偏強晚欲霸江東何不仗劒清許中抽劒試石
石盡碎惜哉負卻干將鋒紫髯嗟汝非英雄

登赤壁作

五月浮舟訪赤壁直上危闌俯千尺循麓下轉蒼山西笑見
摩空萬仞石峨眉仙客來帝傍扁舟弄月歌流光江湖回首
憶魏闕美人遙在天一方酒酣忽挾飛仙舞乾坤一瞬蜉蝣
羽眼中直欲無孫曹何況當時王與呂平生忠孝多奇節九
死崎嶇氣不折宮禁徒呼宰相才流傳但誦文章傑我來長
嘯悲遺風不見扁舟玉局翁老仙一去七百載乘雲徑向蓬
萊宮安得招之下瑤闕更遣錦袍邀太白同泛滄江萬里流
青天攬取峨眉月

安國寺看竹

洗心惟淨域避俗只幽篁不雨翠猶滴無風陰更涼諸天寂

龍象盡日嘯鸞凰欲喚髯蘇起桂牙出酒腸

智林村

明末邑人王子雲孝廉避地于此

阮籍悲窮轍王尼宿露車家門忠孝後天地戰爭餘削迹空
逃世荒村此讀書誰知高隱地竟付羽人居

愚香觀察護暹羅貢使出境賦此奉寄

聖德闕八埏聲教罔不暨憬彼海外夷占風九譯至拜表通
象胥方物爛盈筭犀珠及文鱗間以織成被皇曰惟其德所
寶非珍異有詔大鴻臚諭勿獻奇麗其王遣陪臣銜命脩歲
事令吾賢有司所在善撫慰連帥承詔書推擇外臺使過境

善護視用咎遠人意公也衣繡衣乘驄率候吏賓館儲餼牽
芻禾盛委積贈遺悉卻之丰采可敬畏遠夷感且悅下拜盡
懷惠購公詩卷歸鷄林價可貴公亦攷異聞編輯續海志我
昨甫謁公一見卽攬轡公行猶未旋煙汀但遙企行役有新
詩折梅望相寄寄我五色牋定化海雲氣

赤壁獨眺

朱閣百尺聳崔嵬
俛瞰晴沙繞郭迴
石圻楓根懸岸出
山浮松色渡江來
雲鴻矯翼殊當遠
浦鷺忘機底用猜
九曲亭前香欲綻
方思招客往探梅

過黃州呈鳬香觀察

高名兩賦古今懸詞客重來七百年繡斧方看新使節玉堂
仍是舊神仙三分壁壘滄江外九曲溪山畫戟前過客不辭
陪蠟屐筍香魚美足流連

重向風前見鬢絲依然海鶴晉公姿龍門峻望歸元禮燕寢
清香拜左司抽秘未堪陪後乘定文何敢尋深期適以詞劉集屬子
楨姚合均千里惆悵清尊有所思謂孝長及春木翁

答鳧香觀察見贈

三年重接使君杯坐看長江繞郭回樂歲聲中間吏事好山
多處稱詩才地尋遺墨千秋渺天遣髯仙再世來我是蹢躅
舊時鶴仍隨風月共徘徊

思君若轉飢腸雷千年人事大江逝九月秋風聞闐來待君
到此更題句登臨何用牛山哀

季雅出示尊甫復堂封公海棠巢倡和詩並屬訂蘭石山房
遺集追次原韻

終萼當年乍放梢吟朋稚侶盡攀交爭裁十丈雲中錦
遍屋上茅繞膝聯裾陪鯉對簪毫捷步侍螭坳庭前便是
丹山穴莫向桐花覓鳳巢

紅雲吹墮出檣梢一卷琳琅託古交芳佩尙思攀薜荔靈氛
何處索蘼茅空桑往蹟成三宿荒蕪虛堂賸一坳惟有埒鄉
頻省記春風珠樹憶安巢

謂鳧鄉觀察

自註堂全集卷八終

百柱堂全集卷九

甲辰

監利王柏心子壽著

哀唐生行

黔陽唐生汝立嘗從予遊績學砥行沒於都門黃琴五吏
部出其遺照屬題爲賦此篇

少年竟坐至性死嗟予播州唐氏子使我聞之慟不止汝翁
况隔幾千里汝翁遇我如弟昆遭汝束髮遊吾門當時毛羽
已殊眾靈族自是鸞與鴈同登阪隴何岩巖歸來別汝天津
橋我南汝北車遙遙陸機入洛尙弱冠謂汝唾手登雲霄連
城三獻未得剖風吹瑤林變衰柳臥疴獨在長安城九死不

忘惟孝友秦山白雲不可攀
和鴈入蜀愁聞關雲飛鴈斷
遊難聚悲哉恆幹先凋殘
我來長安不見汝忽見遺容
淚如雨慘澹非復當時顏
通眉但有嘔心苦直木自伐
膏自煎不如社樹終天年
世間才俊最先隕古來終賈
皆已然汝翁五十霜鬢摧
日夕愁登思子臺一棺蕭寺
尙未返白日不到重泉來
圖中黯黯愁雲結知汝羈魂
更嗚咽九原夜望秦城月
定化號鵲淚成血滴向泉臺
長不滅

鴈門策馬圖爲葉潤臣舍人題

驅馬古雲中蕭條朔塞風
關連三郡險山接五臺雄
鴈下長城遠鵬盤大漠空
千秋懷將略英衛首論功

斥堠無中外名王日欵關耕耘蕃部樂笳鼓門閒野曠沙陀塞天高突厥山傳聞花萼集題徧戍樓間

送李梅生同年省覲秦中

宮錦詞臣謁鯉庭西瞻馬首出都亭河流曉抱關雲紫秋色晴浮嶽氣青趙郡勛名高繼相扶陽家世重傳經東風綠到瀛洲草簪筆重來傍帝廷

潤臣舍人出石谷山水障子屬題亡友建寧張亨父所贈也濛濛一片青山春中有奇人不死之精魂魄歸似欲噉鵲血白日慘淡楓林昏奇人昔時起閩海千秋屈賈遙相待剛腸俠性本難移縱酒狂歌終不改酒酣悲憤從中來並海戰骨

何皚皚陣前誰握無忌節幕下空棄樊川才妻子飢寒嗟不止
一身奔竄干戈裏得歸猶作生還人誰知卻傍燕臺死生前
持贈山水圖葉侯對此長悲吁我來未及效挂劍山河邈
若黃公鑪聞在病中已斷酒喜我獲雋起酌斗罷席沈酣遂
不支嗚呼幽冥負良友悽涼鄰笛增滂沱楚聲哀此難爲歌
粉圖在眼不忍視儻有山鬼帶女蘿歸來颯颯悲風多

哭海秋農部六十韻

龍蛇傷歲厄鵬鳥慟年徂直節千秋在雄文一代無眞靈歸
碧落俯仰隔黃墟朱鳳號衡嶽蒼麟泣路隅昔君辭霧隱高
舉步天衢鵬鶚初摩漢驂騑早過都含香華省入簪筆內廷

趨繡豸班仍峻花驄步自殊風霜生白簡日月照青蒲
主聖能容戇臣忠不避愚梗楠羅國幹桃李盛門徒虹采遙知
璞驪淵每獲珠郎曹雖偃蹇榮路未崎嶇知遇恩原重經綸
世所需許身同稷契拜手值唐虞共擬躋三事方期贊六符
正聲淪嶰竹里曲競皇琴太息芳規徧流傳僞體羣有懷擷
蘭芷獨起闢榛蕪志大函羣雅才高隘八區排山回地軸援
斗幹天樞雷雨千聲赴江河一氣驅狂翻銀鑿落勇集鐵浮
圖雕虎生能搏長蚪勢可屠至誠通甫白奇變挾韓蘇盡道
波濤闊誰知願力勛廟堂方拊石島嶼有提枹漢將馳戈甲
天兵下舳艫鸛鵝空效陣鯨鱷久稽誅丹旻憂災沴滄波困

轉輸著書多感激撫事極嗟吁杜牧言甘罪韓非憤自孤道
包王霸略策綜治安暮芹味終思獻葵心總弗渝精誠如不
達緒論此其麤漆室情難默名山計未迂生平多跼蹐流俗
轉抑掄不惜狂名累常嘲曲學拘靈均紛眾嬖孟博嫉同汙
葛儼奇男子崢嶸烈丈夫如何驚噩夢遽爾閤泉途鋒穎韜
千莫光輝匿瑾瑜貞柯遂摧折勁草倏凋枯縱抱無涯智難
留有用軀壑舟今不返朝棟孰云扶寂寂庭羅雀匆匆隙過
駒非材蒙倒屣相見每騰觚肝膽均堪照神明實共孚同聯
京國騎共聽禁城烏令露方沾蕙涼颿乍賁梧過談纔信宿
但化忽須臾落落人間世茫茫造化鑪桂椒香寂寞蕭艾色

敦倫敦治爭言媚閭媼或掩妹源泉繇自寇直木最先剝更
憶松寥子謂亨父曾悲薤露俱風騷關絕續意氣失叩須出世
誰鸞鶴長生亦蠅蛄蓉城應待主蓬島儻相娛莫叩蒼蒼理
巫咸不可呼

題潤臣詩鈔卽以志贈

六義始萌芽厥初在忠孝太上悅靈祇次者輔彝教爾來盛
殯波才智縱輕慄僞體競相沿頓若風中燄吾黨有葉君卓
然踐閭奧羣蕪擢嘉禾眾暗秉孤照修業豈不劬和平神所
勞

聞君處門內愛敬隆天倫今觀卷中詩益知流露真豫章拔

千尺屈曲蟠其根升彼崑崙邱方知長河源君詩本至性元
氣同綢繆雅道終不替長與義娥新

父兄踐通貴出入腰銀黃列宅 帝城裏車馬臨康莊閉戶
在人海峻若干仞岡逍遙覽百氏俛仰凌八荒嘲譽一不計
榮辱兩可忘由來草元客何辭執戟郎

北行出代郡南行踰黔中匪徒攬山水用佐吟事工丈夫志
經世遠覽超城中扼塞審形便疾苦知民風自非走萬里何
由昭發蒙陋哉醒醒子動矜章句功囂斯處蒿下安覩扶搖
雄

伐木義久廢交道日以虧感彼穆與峻發憤嗟陵遲之子叶

麗澤臭味無差池
嘒嘒風雨夕志行何敢縻
久要隔泉壤不負平生期
悲哉松寥子電謝不可追
君詩有餘勸宿草今離離
離范張去已遠古風猶在茲

緊予實曹昧棘林螢自燭
感君惠前綬容納比虛谷
敷衽唱高言斷金義不黷
白雲南向飛未可久竊祿
君當爲國華我當返適軸
出處殊飛沈標尙共貞馥
山石尙不遺庶用佐攻玉

吳郡行送吳子略同年之官越中

吳郎三十稱詩豪
匹馬仰射雲中鵬
白登山空俯大漠
單于戰壘何蕭條
興發起舞揮寶刀
殷紅玉斂傾松醪
呼來塞女

如花嬌篴篴一曲酒一斗歌聲上激秋天高北來昨渡滹沱
水春官一日聲名起鏤管才高三殿前珊鞭影拂九門裏三
十作吏亦復樂何事承明老著作過家錦袍謁兩親浙中山
水况不惡秋風萬里閭闔來尊酒相送黃金臺吳郎才氣世
自少百里烹鮮何有哉政成好坐鳴琴室餘事猶當及詩律
赤城霞氣錢塘潮天下奇觀久無匹惜不從子鬪雄筆滄海
樓頭觀日出

相見行贈馮展雲同年兼憶張南山司馬林少穆尙書

九衢花照春明客與君相見長安陌走馬人人道姓名一朝
並附春官籍同時魏默李梅吳子略袖與邊石道文麗藻皆翩翩

君才俊逸起南海弱冠已號金門仙
峩峩建章待華棟雲韶九奏舞儀鳳
富貴寧誇早致身文章實濟當時用
聞君折節賢豪流南山詩老吟相酬
侯官尙書建軍府草奏時佐籌邊樓
二公愛才世無有當時曾忝相知厚
與君先後同雅遊過從京華更論舊
世間萬事真茫茫尙書白首留龍荒
詩老杜門臥蘿薜三年轉徙烽火旁
詞翰勛名兩寂寞何況賤子等飛藿
君隨祥鷁遊紫庭予當騎鹿返巖壑
與君回首望玉關尺書何日度天山
幾時南歸向嶺表爲予問訊南山老
寒夜讀書圖爲小舫同年題

月華照地霜氣清溫卷獨繡寒宵繁
三載計車滯京國一朝

飛步遊蓬瀛海內共誇名父子金匱藏書紉太史尙憶垂帷
冰雪深今看簪筆聲華起卿雲五色金門開柱下一宿隣三
台平生稽古始得遇華選實儲公輔才君不見草廬抱膝自
淡泊讀書但解觀大略又不見希文山中山齋粥時心與天下
共憂樂詞臣獻納當何如報國豈不在訐謏班揚詞賦工何
益要讀人間有用書

題展雲同年吟卷

年少何多感千秋屈宋心微詞關諷諭古調託遙深春雨湘
中草天風海上琴聆聲吾已辨此是楚騷音

幼有奇童目今誇柱下才星文逼華蓋仙閣倚蓬萊瑞協遊

麟至時清
麟鳳來詞臣高著作應和柏梁臺

贈韓叔起同年

滄江有孤鳳日夕鳴聲悲聲盡鳴不止淚血紛交垂問鳳亦
何苦中心實憂危不諫區區志欲徹蒼天知蕩蕩九萬里間
闔無絲窺紫庭奏廣樂雜然吹笙篴雷霆下總總豐隆鞭豹
螭天聽有時隔汝居嗟太卑

長安聲華窟競豔如桃李何意塵壒中特立見貞士挺如百
尺松謾謾勁颿起忠愛篤君父峻節厲庸鄙發言陳苦心聽
者反塞耳邂逅得同志謂帥逸齋高節勉相砥我亦慕微尙未肯
汨泥滓三益請從遊盡謝夸毗子

君昔在兵間轉徙驚烽塵往事勿復道來思方無垠琛賁匣
矛戟冠裳易介鱗啟戶去其錡甘與豺狼親愚者樂長楚智
士憂厝薪謀臧適不用無謂秦無人

九日憶弟

西登隴首南荆鄂歲歲重陽滯遠遊佳節倍憐兄弟會看雲
獨在帝王州十年猿鶴山靈怨九月魚龍澤氣秋北地豈
無桑落酒南方誰有稻梁謀

昆明湖秋眺

玉澗千聲落銀河萬頃秋風高黃鵠下天闊彩虹浮勢異瀕
池鑿川同御宿流只疑逢漢使楂影拂牽牛

霜樹黃初染秋蒲碧尙環晴光涵北極佳氣滿西山閤道丹
霄上樓臺紫霧間側聞恭儉主鳳舸至今閒

建章

迤邐甘泉與漢通武皇多在建章宮駕鸞隊列千官肅龍虎
軍屯七校雄天近繚垣來澗月宵深清漏散林風九重聞道
宸居壯高拱還宜紫極中

金海橋

飛闕騰金鳳長波臥石鯨天臨雙鏡合秋擁五雲晴澹沲搖
深碧光華接太清水嬉今不設寶儉仰皇情

簡叔起抑齋

九門車馬日喧闐中有崢嶸兩少年結客最輕遊俠傳憂時
唯擬治安篇空階墜葉驚秋雨蕭寺疏鐘破晚煙知爾未能
陳薦牘迢遙間闕五雲邊

偕展雲同年過憫忠寺

遠海旋師日曾聞瘞國殤琳宮開象教金地侈貂璫演諦幢
仍在披文碣半亡恆沙思浩劫古意滿漁陽

俊侶偕幽討祇園訪薛蘿心從初地遠秋在夕陽多鐘磬清
塵想軒車閱逝波海棠花下約莫忘此經過

墨花頌

會稽樊蘭皋廷枚明經邃於經學嘗注四書釋地補以孟

漬墨汁染於絮人之替蓄作花綠萼而黃心有異狀焉其
門人陶楂仙舍人爲作記徵題

騷述芙蓉詞豔而夸釋演空諦眩彼曇華匪道之宅匪聖之
涯匪君子所嘉

觥觥樊君惟經術是程惟魯鄒是承如彼邱垤仰希於岱衡
如彼行潦必趨於東溟

矻矻懷槩釋地云補是搜是剔證尋今古金壺墨瀋濃如露
醕以絮漬之盤杆是貯

孰擢其耐孰揚其蕤其房斯植其藥斯垂曾不孳甲條以紛
披曾不萌葉條以華滋

匪道德之英曷爲其春匪經訓之根曷爲其新何所蓄蓄曰義與仁何所馥郁曰道與文

噫嘻墨守不閤其光不替其芳君子之常伊君子之祥神之相之不於其遇而學術之是昌

其昌維何稽古之劬奇葩天秀內美所攄千春馨逸不可凋枯儼彼書帶以表鴻儒

湘之水

美長沙李貞女也

湘之水清且深自非清且深莫照貞女心

貞女系出李幼字湘陰郭氏子兩翁同時宦瀟水兩家先後

歸鄉里

七齡誦德象十三工織素慊慊緝圖訓彤史心所慕

忽夢少年褰我幙鮮衣楚楚易復着白云先楠其名姓爲郭
生不汝榮死汝託去汝歸冥漠

白者玉紅者椒宅中會食相招邀覺而思之憂心忉丹山鸞
與鳳母乃當飄搖

詰朝凶訃至噩夢果爲災涕泣請於母素髻往盡臨喪哀母
欲止之以死自誓不可回

遂入郭氏門遂稱郭氏婦以婦代子職死者不憾生不負

紅者椒白者玉茹苦辛矢貞獨大海可竭山可傾夢中之言
義不可黷

或云女未昏豈等臣委贄此語非至論綱常安所寄交遊相死在一言何況民生重匹儷白石自云堅未若貞女志上以扶蒼穹下以維厚地

蒼蒼女貞林上有寡鵠吟吟聲一何苦日夜湘水潯疾風吹波波不起澄波照見貞女心湘之水清且深

題曾滌生宮允所撰陳岱雲太史室易安人墓誌銘後

判合肇二儀貞義無敢渝譬彼木連理枝葉同榮枯我讀曾侯銘彤史光石渠云有易安人奇行世所無巾櫛事夫子黽勉忘其劬自從列朝籍入踐承明廬相對擁黻佩五載情則愉夫子忽遘厲侵尋三月餘靈草不可致涕淚霑羅襦安人

禱神明願以身代夫計窮無所出臂肉躬自剗倉皇納沸鼎
藥餌潛相濡手此進夫子沈疴頓已蘇方在割臂時血痕漬
衣裾有弟詢得之悚然起嗟吁安人戒勿道禍福在須臾濟
否尙難卜名譽非所圖妾命且不顧何論尺寸膚果然遂獲
濟神力良有諸磅礴大宇宙民彝實相扶傾側孰摭拄全仗
忠孝愚結髮戴所天義豈臣子殊患至任補救赴蹈輕微軀
偉哉安人志實與神明孚彼蒼何不弔祐善理則虛疾疾丁
其躬冥漠歸泉途况瘁靡不任安樂忽已徂至性秉奇傑但
以濟艱虞雖無金石壽名與天壤俱湘水清無極湘山連海
隅百丈鏤青琅奮筆爲大書白日照其上垂光朱鳥墟激烈

振頑懦千載猶歛歎

葉東卿封翁得周遂啟謀大鼎用王西樵焦山鼎詩韻賦詩
徵和依韻成此

深山鼎螯誰能索負之當遣圉人犖按銘實賚遂啟謀帥師
有功告廟作周自宣王稱中興大蒐岐陽會東洛當時石鼓
文最奇下掩嶧山與邠閣北逐獫狁城朔方邊庭無事靜不
愕戎車六月先啟行采芑新田戰士樂君臣修政攘四夷朝
廷威德至廣博啟謀才亦方召儔奮擊直下秋天鶚折六百
首五十篚迅掃疾風卷敗穽赤芾彤矢歸策勲頒之尊彝盛
酬酢勒銘于鼎昭膚功何年轉徙閩邱壑詩老好古偶得之

性與巧豪異爭攫萬本摩挲繫歌詩疏證傳註訂舛錯持此
至寶留金山永鎮江神夸海若焦山有鼎遙相望盛事差可
免索窠中宵光氣高燭天南箕北斗共交錯令彼百怪悉帖
伏萬里滄溟靖寥廓

過浮邱宅感賦

宣武城西路浮邱此人居未聞旌折檻猶待問遺書駒隙無
留影雞栖有敝車不須隣笛奏清淚已承裾

丹旄何時達懷其望遠嵐直聲三殿北勁骨五湖南空託青
蠅弔誰雄白馬譚文章兼氣節逝者獨無慙

贈家孝鳳兵曹

萬里寧親路身穿虎豹羣淚痕飄颻雨春色墮蠻雲昭雪行
將及呼天尙未聞願銜丹鳳詔不慕碧雞文

一第尋常事多君綵服榮雲猶溟塞望星爲省郎明武庫今
無敵文雄舊有名禁中儲頗牧期爾一論兵

藉甚黃岡族紛綸擁玉珂才華三楚冠忠孝一門多塵尾名
家物龍媒漢代歌清芬留史冊報國更如何

慷慨歌

慷慨復慷慨中宵擊劍忽不快但憑尺木無浮雲矯首安能
躍天外君不見漢廷用事多公卿少年何來輕賈生又不見
龍門朝獻太平策拂衣暮返河汾宅美人如花青雲端星厓

綴衣霞爲冠上清宮中盡注籍出入導從驂飛鸞紫庭無事
多遨遊仙曹觴宴呼行籌容成鼓瑟韓終謳玉女大笑電光
流若華九陽照不夜天河豈有清淺愁上界行樂盡如此地
上乃有妄男子行歌五噫吟四愁仰天抗聲不能止眾仙聞
之紛相哈東龍西虎環帝臺六轡舉首戴四極天柱不折山
不摧下客何事吞聲哀

烏府行贈朱伯韓侍御兼憶蘇賡堂給諫

烏府先生起嶺表吟詩獨學杜陵老上書闕下多報聞時託
詩篇代諫草出入但有雞栖車朝退蕭然惟讀書輦下才人
復不少先生雄筆誰並驅世言汲魏不可見今見先生實邗

彥但論詩格已嶙峋何況直聲振臺諫嗟乎妖氛動海國誰
爲朝廷畫兵食救時終倚管蕭才心計何勞桑孔策黃流
再決勢益橫河隄使者日請命海邊白骨猶未收天下蒼生
又已病進賢戮冠如浮雲臺諫高議唯有君海南蘇子亦謬
謬臺端遂有兩直臣蘇子昨者返鄉里麻衣秋風渡灘水我
慙進退無寸補獨喜先生遇明主國家大計先宏綱餘者
未足煩封章但須注意相與將請持此議陳明堂萬年垂衣
朝八荒

海市曲

漢家表餌有奇勛談笑眞看靖戰氛島嶼千帆張海市樓船

五道罷將軍

紛紛鯢壑慕華風
罄地窮天九譯通
番婦縱酺鈴閣下
豪酋飛蓋節樓中

牛羊餽餽盛山邱
終日錢刀地上流
胡賈攜家成子姓
萬年中國是神州

百寶龍宮駭不如
番奴列貨邸中居
高臺大築祆神寺
寄籍先求上國書

市樓椎結徧紅毛
駱驛占風海上艘
間殺防邊諸將士
日中猶看蜃樓高

犒贈金縉歲歲殫
居民垂涕遠夷歡
上書卜式眞男子
緩急

持錢佐縣官

中宵泉客自吞聲
戎莽誰虞肘掖生
結贊曾聞欺馬燧
平涼猶受吐蕃盟

十月十六夜宿澄生太史宅出雨中懷人詩見示輒用其韻
紀茲夕情事贈太史且簡郭雲仙馮樹堂兩孝廉

高槐蔽霜不可摧
月華如水空中篴
退直已下九門鑰
曾侯留我听然哈
烹魚沽酒飲達旦
慰我幸脫鼃鼃災

是時荆
郡大水

間二子抗英辨相與
抵掌奮頤顛羈宦
胸臆久結約驟若春
霆轟蟄坯相逢爲樂在
今夕尙書期會安知哉
侯昔駟馬入劍閣
五丁運斧天爲開
嘉陵之水瀉不盡
奔騰萬折何雄厯

歸來汲古日鍵戶大笑世俗喧
蟲雷偶然愁霖動高唱縮瑟
翻爲三君哀榮辱勞佚孰主宰
掉弄造物然且猜讀詩知侯
意何廣萬千間厦胸中恢今夕
不樂日月逝黃河走海不可
回急書長句起相和連藻惜乏
奇花胎懦夫一旦見賁育奮
臂不欲良其晦明年我歸事耕
釣幾時過訪山中來江上有
魴復有鯉請注江水添金杯

復用前韻贈雲仙

雲仙在都資用乏絕予爲作書
告之監河侯越三日雲仙
袖札見返曰貧者士之常不可以
是貶吾節予重其言故
作此篇

井爲天鉞鋒未摧維南有箕曾不從虛名自負類如此愚者
夸勢智者貽郭子靜觀息六鑿覺顙不受雕陵災留侯狀貌
若女子肯與隨陸騁吻頤獨窺窔奧喜深造百仞屹屹高城
坯長安貴人不薦士榮辱於我何有哉鄉人好賢遇曾鞏掃
徑特爲三益開商榷文史質道義門外車轂徒撞厯昨我退
直快申旦屢顧劍匣生風雷司空城旦旣悞我憐子尙抱荆
璧哀奮然郢書效舉燭夜光或免投暗猜子乃袖札復致我
超然榮觀胸宇恢戰勝者肥有餘樂曲徑窘步安可回萬物
榮悴迭相代不見東魄西復胎貪夫風塵汨面日志士鐵石
鍊脰臍我慚知子尙未盡况有朱紱占方來明年簪筆金莖

側爲我沈瀝分一杯

宣城梅伯言丈過予爲言馮君樹堂志行甚奇某御史上書
擊姦報聞而已君走叩御史門曰言不用可以去矣某雖
貧請釀金以治裝又嘗館要人宅心薄其所爲一旦辭曰
若不任吾主人無久溷公爲遂拂衣去鄉人曾滌生聞而
招之往下榻焉相得驩甚予壯其節仍用前韻賦詩一篇
贈馮君

纔指爲柔剛則摧批稊性乃隨人篋士無定力喪厥守馮君
見之詆且哈布衣雖賤守直節人旣鬼責焉能災宣城梅叟
昨道子使我喜笑騰顏頤霜臺御史號敢諫擊姦未去穴深

東坡全集卷之六
五
坏君也叩門謂御史曷不挂冠神武哉諍臣作論今復見聞
者盡覺心膽開君又假館貴游宅日夕車馬聲相逐主人門
庭頗似市談笑可使生風雷長揖徑謝主人去丈夫豈憚溝
壑哀曾侯招君往下榻海鷗無復機心猜我相奇士始得子
廉勁可匹漢樂恢人才根本在氣節中流砥柱瀾可回國之
隆替豈一旦視彼佞直先胚胎正直在位世必治其受委任
猶腰膺馮君馮君古遺直覽輝當爲卷阿來好持直道佐明
主我行日醉山中杯

卽子行贈逸齋

江東開府之子孫至今海內爲清門韋丹功被八州境遺德

尚有甘棠存開府山中躡箕斗詔書特錄名臣後聞者惻愴
懷皇仁况子戴恩等高厚束髮便慕伊與萊每飯不忘康濟
懷願將姓名照竹帛蚤有雄筆生風雷長安獻賦罕知者軒
蓋門前亦何寡丈夫豈復悲途窮往往浩歌淚盈把聖皇恭
己隆守文萬國盡仰唐堯勤憂危明盛古不廢獨以宵旰勞
吾君太微宮中列星麗藹藹羣龍各在位從容盡道經綸才
慷慨誰陳天下計不聞東南用頗牧可惜黃金委川谷匈奴
頗笑田千秋上書何人效痛哭人謂帥子狂少年我知帥子
非徒然念欲報國阻天路尙作蛟螭蟠九淵大賢之孫踵前
武努力高步取珪組但用赤心答明主上爲朝廷下門戶

不爾地下媿開府

晚直西曹

吏散虛庭寂栖禽自不驚署依金虎肅輪對玉蟾清竟夕爰
書擁中天貫索明圓扉無怨氣三宥戴堯情

贈戴雲帆水部

屯戍歌何早飛騰興已孤門庭稀骨肉生世謝歡愉晚節栖
郎署高文滿帝都猶餘報國意不忘伏青蒲

戶奏皇琴曲深愁古義亡沈吟心獨苦比興意何長予美招
蘭澤臨風襲蕙纈遙遙騷辨後誰道替芬芳

寒夜讀亡友張亨父遺集感而有作

集中皆避兵東甌時作

軍興不復臥林泉
歎息人間老謫仙
杖策乾坤餘涕淚
竄身江海盛烽煙
誰收劇孟登戎幕
未傍要離結墓田
萬丈龍湫鳴咽恨
空山鸞鶴尙悽然

喜雪

芙蓉闕下賀祥雲
昭貺圓穹慰聖情
玉樹宵封鳩鵲殿
銀雲曉散鳳凰城
齋壇不紀芝房瑞
郊甸先占麥隴榮
止輦郎官何所獻
萬年兢業迓豐亨

雪霽晚出宣武門

玉龍遙抱帝城雄
蕩蕩天門顯氣通
九陌無塵寒盡斂
夕陽

金闕五雲中

郭葵臣宮允以雪後放歌見示賦此答之

仙人餐盡嶮山雪萬片瑤華作詩骨鶴擎翩然蹋玉塵年年
爛醉蓬萊闕壯思飄發不可裁鞭笞白鳳天上來高歌郢客
登臺曲羞鬪梁園投簡才是時齋宮感天意天表豐年爲上
瑞冬澤先飛六出霽春田定兆雙歧穗千官拜表進彤墀誰
似官寮有直詞從容吉甫清風頌忠愛香山賀雨詩 聖人
持盈守謙約羣公努力贊橐籥小共大球萬國來男穀女絲
天下樂寒盡先回帝里春朝衣未典莫言貧東方縱橐金門
米猶勝郎潛皓首人

田父逢列仙行

夜半雨三尺朝來杏花白田父拍手牛背歌
踰徧村南復村北道遇蓬萊仙雲衣垂翩翩
田父往問訊子何來田間答云紫府拘束久
且疲玉山禾熟不療飢上清真誥讀盡三萬卷
太乙黎火難爲炊後來秦篇史王子晉亦有金華牧
羊兒紛紛少年子道成飽且嬉騎麟翳鳳凰出入盛威儀
以此厭追逐徑欲蕞苴來春畦草長如煙花作泥牛角挂書更載酒泥
飲自唱歸田詞田父謂仙者子母去金馬仙曹自是天上人
豈合栖栖在田野方今日月光太清五雲宮中鏗咸英帝旁
執戟皆歲星羣仙樂職朝紫庭斟酌北斗襄璣衡何不牽牛

往飲銀河水天田服箱載剌耜匏瓜星明歲大穰斗米三錢
樂婦子大賢養民乃如此下土之人安能比田父語畢去仙
者返天路回首望九霄蒼蒼但煙霧田父騎牛歸浩歌日將
暮堯舜之世多夔龍其下亦有石戶農春無苦旱夏無潦穠
酒初瀉眞珠紅潁陽二叟好名不足道田父但願長作多牛
翁

夔臣宮允除日預賜宴賦詩相示用東坡贈段屯田韻卽依
韻答之

自我官京華冉冉歲過半莊舄仕執珪越吟每增歎不見江
上梅客心誰與玩題勉府中趨下直輒先散起賦螺洲吟

螺洲

予所憶我白鷗伴除夕獨隱几坐待雄雞旦故人宴蓬萊仙
吏近香案湛露霑堯鍾颺颺舞不亂面藥暨口脂三日香猶
盟斗邊春已回天上漏仍緩示我詩盈牋纍纍珠如貫君若
威鳳翔予猶凍蟄使媿無陰何才重撥灰中炭感君推轂心
欲置平津館草長河冰消蘋生楚江暖礪齒從茲歸請漱白
石粲

臺前韻酬夔臣官允屬將乞歸因以告別

郭侯敏於詩咳唾落天半世無師曠聰聞絃誰解歎陸沈金
馬門酣歌世可玩日華絳闕縣朝班紫宸散速藻疾若飛傳
牋索吟伴我方困法曹低頭誦城旦筆楚列階庭文書堆几

案法密九牛毛目精欲瞽亂退食恆發慙兼旬忘櫛盥歸思
如春潮入夜不能緩方當理桂綸其魚柳可貫不然叱黃犢
筋力亦未便隱矣焉用文默默類吞炭敢隨揚子雲獻賦射
熊館移文懼見嘲歸轡喜逢暖他日倘懷人零雨念王粲

白柱堂全集卷九終